

官板  
六合叢談

刪定本

三

特別  
18  
249  
3

9 60 1 2 3 4 5 6 7 8 9 70 1 2 3 4 5 6 7 8 9 80 1 2 3 4

門 卷 3  
號 249  
卷 3

卷之三

目錄 咸豐丁巳三月

地理 釋名 水陸分界論

希臘詩人略說

泰西近事述略

印度近事

粵東近事

雜紀

六合叢談 卷之三

早稻田大學圖書館  
26.1.16  
陳 宗

地理釋名

地球每日自轉自西而東面西而立則左爲南右爲北自轉所繞之線曰軸軸之北端曰北極南端曰南極球腰大圓周距二極各九十度曰赤道赤道北爲北半球南爲南半球過二極正交赤道諸大圓周皆曰經線過京都之經線爲中線偏東曰東經度偏西曰西經度與赤道平行諸圈曰緯線地球大周分三百六十度每度二百里距赤道各二十三度二十八分南曰晝短圈北曰晝長圈距晝短晝長圈各四十三度四分南曰南極圈北曰北極圈晝短晝長二圈之間日恒近天頂過氣候酷暑曰熱帶晝短晝

長二圈至南北二極圈其間氣候溫和曰南北二溫帶二極圈之內氣候極寒曰南北二寒帶斜交赤道切晝長晝短二圈之大圓周曰黃道乃地繞日之道即視日繞地之道黃赤二交點曰春秋二分點日至此二點統地球晝夜均平過本地之經線曰子午線此線面日爲午正背日爲子正午線東爲午前西爲午後凡經緯線俱分三百六十六度度六十分分六十秒緯線在赤道南曰南緯圈北曰北緯圈地球大圈分三百六十度赤道至二極爲四分之一故南北緯各九十度經線所起曰中線分地球東西各一百八十度中線各國不同中國則以順天爲中線也地爲

圓球故漸遠赤道經度漸狹而會於二極焉至於水土之分廣陸曰州環水曰島百川所朝宗曰海海之大者曰洋高出地面曰山平者曰原水流者曰河匯者曰湖此皆易知者不具述

水陸分界論

分地面爲東西兩半球各有大州東州古今人所共知西州於前明始覓得之此外又覓得大小群島或東或西棋置星布水陸無定位時時變遷動植諸物隨之更易陸地若多在熱帶內則動植諸物必與今異在寒帶內當更不同水土支幹與諸行星無涉而于動植諸物則關係非輕

今之支幹形勢雖知其大略而未能細考其所以然若地殼高低相去不遠則河海不深水滙於寬處若相去甚遠則河海深下而水滙於狹處高低相去不遠水滙寬闊之所則地面氣候溫和日氣薰蒸水氣散入空中聚而爲濛霧凝而爲雨露凡陸地動植諸物悉賴之水族恒生于淺水故洋海動植諸物每當不甚深處更盛欲考古昔水土支幹但觀磐石層累所著之迹即能明哲水陸之比例陸三水七統計地面方里者十六億四千五百三十六萬三千七百水約得十一億四千五百三十七萬陸約得五億北半球多陸南半球多水南寒帶中新覓得之地以意度

之或亦爲大州之一方分計南北三帶之陸地北半球寒帶內方里者二千七百十四萬溫帶內方里者二億三千八百二十九萬熱帶內方里者九千七百零五萬南半球寒帶內未詳溫帶內方里者三千一百九十九萬熱帶內方里者一億七千七百十五萬水陸之形高下凹凸似無次序而功用甚大洋海平流潮汐方向及波濤之力俱因之而生洋海平流感於寒暑生一切動植諸物而浮質漂至海濱即沈水底潮汐升降之力因陸地形勢沿岸曲流衝刷泥沙海濱波濤洶洶支河港汊或開或塞淺水雨漲侵蝕陸地之質徙運入海而火山地震平陸沈陷海底墳

起坐此水土支幹屢致變遷但由漸而來故人不覺耳雖  
未見大州陸沈然不可云今之地勢後當常然不見往古  
紅砂石時其水土支幹至今一無存者耶

希臘詩人略

希臘詩人和馬者紀元前九百餘年中國周孝王時人也  
作詩以揚厲戰功為希臘詩人之祖時僅口授轉相傳唱  
而已雅典王比西達多時當周景王五年校定成書編錄  
行世其詩足以見人心之邪正世風之美惡山川景物之  
奇怪美麗紀實者半餘出自匠心超乎流俗海修達與之  
同時所歌咏者農田及鬼神之事周末一女子能詩名曰

撒夫今所存者猶有二篇又有亞拉改阿斯西磨尼代以  
比古斯罷基里代斯諸人之詩今猶存數篇又有賓大爾  
者以短篇著名善作疆場戰鬥之歌又有亞那格來恩者  
善言兒女情私及男女燕會之事如中國香奩體周定王  
時希人始有演劇之事每裝束登場令人驚愕者多怡悅  
者少有愛西古罷者作傳奇本六十六種今存者七種觀  
之能樂于戰陳有勇知方周貞定王時人後有二人一娑福格里  
斯一歐里比代娑所著今存七種精妙絕倫人尤愛之歐  
所著今存二十種筆意稍遜所演兒女之情誨淫熾欲莫  
此為甚以上諸種傳奇長於言哀覽之輒生悲悼時有一

種傳奇意存諷諫皆譏當世之名公鉅卿學士大夫正風俗而端人心或署己名或托名他人傳于當世又有阿利斯多法尼者著詩十一種譏刺名流志存風厲然其詞彬彬文雅有足多焉蓋其時民俗卑陋未知風雅故聆演劇之歌謠甚覺其悅耳也于時有一人名梅南特爾作傳奇數種才氣高邁而無粗豪之習惜其書已佚羅馬人德論低烏斯與之同時喜其書譯以臘即位體納語有書七種至今猶傳于世攷中國傳奇曲本盛于元代然人皆以為無足重輕理學名儒且屏而不談而毛氏所刊六才子書詞采斐然可歌可泣何莫非勸懲之一端西人著書惟論其

才調優長詞意溫雅而已或喜作曲或喜作詩或喜作史皆任其性之所近情之所鍾性情既真然後發為文章可以立說于天下使讀之者色然而喜聆之者躍然而心服也夫人既抱不凡之志負非常之才著書勸世以仁義道德為本豈不甚善蓋希臘為聲明文物之邦其詩學已可見一斑矣

泰西近事述略

丙辰十二月十五日郵寄之信札始離英京倫敦正月八日諾納驛船從孟買啓行十三日離加利十九日離檳榔島二十二日離新嘉坡以林驛船於二月七日離香港十

二日抵滬所遞近事如左

英國於丙辰年所徵賦稅之數戶臣刊發清單頒行通國其數增於往年國阜民亨稱極盛矣英賦共有八等其七等皆較贏于舊所定八等賦額如下一關稅二地租三印票四戶產五丁戶田產六信局七官地租稅八雜徵總核一年中所入計銀二億八千八百八十七萬五千九百五十二兩較之乙卯多銀一千五百九十一萬一千零八十八兩此皆國家維正之供也邇來民間徭役較爲輕省而國課轉贏計丁戶田產銀得六千四百一十一萬三千六百八十八兩英近例徵稅甚輕列邦商船鱗集稅銀之多較

昔倍蓰一年中計得銀九千四百四十七萬三千五百兩多於乙卯四百餘萬地租銀取之亦寡貨物充斥貿易轉盛一年中計得銀七千二百二十九萬五千一百一十二兩本國中書札皆由信局往來郵遞無論遠近每函例取銀一分數厘一年中計得銀一千一百四十七萬六千六百零八兩多於乙卯四十餘萬今書其大略如此以見薄賦輕徭則上下皆足用矣○英主新命公使訥白爾往莅合衆國蓋大臣之爵位顯貴者也

丙辰十二月十一日列國公使會於法京巴黎斯論土國疆里事已有定議按前所立和約俄土接壤之區未嘗申



六合叢書 卷之三  
畫郊圻多惱河口有彈丸地曰蛇島和約中未之議及今許歸土統轄多惱河濱之地亦與之摩拉達維新定之界今已遣使前往為之區畫現抵土京君士但丁必即往彼度地繪圖約以三月五日定可竣事于時多惱瀕河之地及土國內河凡英與奧地利所戍之兵概行撤回列國公使再會于法京以待使反告厥成功俄國荷德沙邑有信至云城墻傾毀其地為俄屬邑瀕於黑海昔年貿易繁庶商賈輻輳後與英法爭戰時慘遭兵革民人離散城堞燬圯無復往日之盛矣○近俄有武弁數員至法特詣軍械局究心於造舟器諸機法更有武弁將往阿洲之阿爾及

耳觀戰陳事俄帝近臣四維阿多巴亦在其中蓋其地有舊部落之民曰加比利與法相戰而法舉兵往攻之也瑞士國有信云二國之兵端必弭釁可不啓法帝婉告瑞國令釋囚修好則勸普魯士王割牛沙德一部歸瑞統轄倘普魯不從則法將備兵于瑞境且為之戍牛沙德英與法意見亦同諭其母傷和好今已遣使臣往說其和為二國介紹一釋囚一割地各彌舊憾毋相稱兵是以人言是必無事共享平康矣

丙辰十一月二十四日西西里島之巴勒摩有信云叛黨頭目皆已正法逆首便的分迦就戮時神氣揚揚毫無懼

色舊例決囚時以巾裹其目然後發鎗擊斃之今便逆求無用此欲目覩其死為快行刑者不之許以舊例不可易也臨死作遺書以物產奉母并給昆弟且求那王母多行戮首亂者惟已一人其餘叛者概請赦宥啜茗受刑至死色不變是真凶頑之尤者哉或曰那不勒官軍與叛黨潛約為亂者不少○那國于丙辰十一月二十六日有信云那王許公會開火輪車路從那京東至他蘭多灣復至羅馬交境通國中自東至西計七千二百餘里得奉此詔者法人大求也又有法人素具才幹凡一切建路之事皆經其擘畫焉

土京有傳聞之言云俄國提軍一萬往征西爾加西為其所敗地近排渡

波斯國主上書俄帝求帝匡其力所不逮而教其所不知近希臘國雅典尼迦拉二邑禽盜目十一人寘之法希郵報云阿百尼民介于土耳其境者多為盜喜鬥掠而土耳其率優容之悉置不問以致盜賊蠡起流擾希境希兵防禦甚密已殲其渠魁三人

瑞顛國舊設議院四一有爵者主之二教師主之三城中巨商主之四鄉間俊民主之爵院中二千三百人師院中教主十二人其下教師六十人城院中九十七人鄉院中

一百四十四人國中凡工賈操業者各設公會舊例欲選  
入入城院則必擇公會之良者以當之近立新法無論何  
人凡居于城中或行賈于邑者苟其才能皆得選舉昔四  
院各自建議不相商酌今集于一處共論可否其法較前  
為密矣

合衆國首領薄家南新為民所推立丙辰十一月六日議  
院紳士羣集舊首領庇爾思四載之期已屆將謝政柄歸  
田里乃按舊例蒞議院備論國事宣示衆民其略始論統  
國疆土以及選舉紳士之事繼論賦稅銀至丙辰五月二  
十九日已匝歲矣總核所徵之銀七千六百九十一萬八

千一百四十一圓并乙卯盈餘之項共得九千二百二十  
五萬一百十七圓償國債本利一千二百七十七萬六千  
三百九十圓統計國家度支之費共銀七千二百七十四  
萬八千七百九十二圓現國債尚存三千零七十三萬七  
千一百二十九圓即今歲一併清償亦無難也總核前五  
年度支之費每歲約四千八百萬圓以後五年此數亦可  
足用前年計關稅六千四百萬圓今當別立新例不得過  
五千萬圓舊歲兵士徵調孔煩阿里顏華盛頓二地之紅  
人爭戰未已今望各罷兵旅與民休息共享昇平又必新  
定章程以修軍政惟水師尚強悍可用舊歲所售公地計

得銀八百八十二萬一千四百十四圓，信局中度支銀一千零四十萬七千八百六十八圓，徵郵寄之銀止七百六十二萬八百零一圓，虧二百七十八萬七千零四十六圓。此因統轄信局之員糈祿太重，火輪車郵費太多，而郵船載客收銀太少也。後當定例，加增其額，以補不足。又言本國今與列邦和好相安，無事現於英京新定和約，各期輯睦，已定中亞墨利加之地，舊歲出口之貨運至加拿他者，較前歲多銀七百萬圓，進口之貨多銀六百萬圓，統計出入貨銀共四千二百萬圓。本國商船往連國貿易貨物，船鈔求其少減，而未有成議，後必更籌商之。在西班牙國近

事難以措手，即往時所存嫌隙，亦未能釋然。現本國遍發檄文，請於歐洲列邦云：若日後二國爭戰之時，倘遇其國載貨民船，勿復擄劫，著為永例。此議定可見許于列國。今俄國已許我矣。本國接壤之區，有墨西哥尼加拉瓜新加拉那大諸國，其地常多亂民，反側不一，與之通好，殊難近。因尼加拉瓜政出多門，亂尚未定，故與本國不通往來。庇爾思所論詳備，此特撮其大要而已。

尼加拉瓜有信云：瓦克禦鄰境之民，屢戰獲勝，軍威甚振。丙辰十一月十四日，瓦之將軍好訥比，僅率兵二百人，戰于哥斯德里加哥，將加拿備軍一千一百人，與之相持，敗

績死者二百人，好軍死者二人，傷者十一人。瓦軍又戰于馬撒雅，轉門四日，卒勝其軍。現瓦克往加拉那大，出示諭民，限以三日，盡遷器用財賄出城。三日後，縱火燬之，民乃遷于里法。後以里法為尼部都城，尼部小師船與哥斯德里加之大師船戰，哥之師船一為礮丸所中，焚及火藥船，盡壞，人俱溺死。統計三月之中，死于疆場者三千人。

印度近事

丙辰十二月十八日，總督諭遣第二軍前往波斯，將軍烏德蘭為經略，統領全營。二十日啓行，離孟買進抵波斯新

募土兵，已有三隊，以供徵調。人謂此舉也將以備大役。阿富汗王陀思馬哈墨于十二月六日從格麻關抵英屬地，與英公使羅倫思議英之兵士假道阿國以往希辣之事。待籌議已定，然後兵之行止可知也。

粵東近事

近有驛船名廻，從香港至澳門，半途被劫，事與前略相類。正月二十九日是船載貨至澳，西人共有十餘舟行至半英客方食，粵人忽起為亂，開軍器艙，取鎗矛刀械，猝奔入艙，舟中人盡被殺。一英客與之鬥，人衆力不能禦，乃自投

于水得藤椅，憑之浮沈，水而繼為他舟，所救得不死，其膝已為鎗彈所中，醫士見其傷劇，為之截去其股。

雜記

近有火輪船拜阿尼，自正月為始，每日由上海至吳淞口，來往以潮漲落為度，逢禮拜日則不行，載客附貨例有定價，客艙取洋半圓，次艙取錢二百五十，若客欲往還者，倍之，每信一函取錢五十，送至其處，一處有二函，則每函取錢三十，附一小包取錢百文，其取價廉，其行路捷，於華人良便。

近合眾國教士吉君作地理志問答，以上海土白寫以泰西字音，因中國各處土白有音無字，傳寫易訛，且易一處而聲音迥異，字各不同，故用泰西字以寫一方土音，較為便捷，其法以字母三十八韻四十二，互相湊合，無論何音皆可得聲成字，吉君前作一書曰上海土白入門，詳論其法，熟讀是書，則地理志亦可曉然，遍覽矣。此法近行于甯波、廈門、福州，惟各處土音互異，所寫亦因之而變，按是法之行，昉于元代，以蒙古字寫中國諺語于石碑，錢背猶可識其遺跡焉。

法京巴黎斯城中有藏書大庫三十五所，其庫有公有私

公者凡十一所其名如下國庫中計印本一百四十萬皆  
巨冊也外此有卷帙不多未付裝訂之書三十萬本鈔本  
八萬冊軍械局中印本二十二萬冊鈔本六千冊酬勲堂  
中計印本十五萬冊鈔本四千冊大藝院中計印本十二  
萬冊鈔本五千冊有大塾曰沙盆中藏印本八萬冊巴城  
官庫中藏印本六萬五千冊鈔本三百冊醫學中藏印本  
四萬冊生物園中藏印本三萬五千冊傷老兵院中藏印  
本三萬冊奇器局中計印本二萬冊樂院中計印本八千  
冊秦西之書卷帙繁富一冊約抵中華書數十卷上諸庫  
中藏書皆許人入而誦閱惟不得携歸

近。在法京巴黎斯有鬻畫苑依西國拍賣之例買畫者各  
喝其價昂者即得其中價貴者如一女子小像售銀二百  
十六兩兵士巡守局售銀四百九十六兩此外山水圖繪  
之作售銀六十四兩酒肆售銀亦如此數馬二匹售銀八  
十四兩法國疇人小像售銀七十二兩法古貴婦小像售  
銀七十六兩此皆名畫家傑構馳譽古今妙擅丹青者也





